

■ COLUMNA

Tgi che sa rumantsch...

GIERI SPESCHA,
PORTAVUSCH GRISCHUN VACANZAS

Idat bain strusch in auter tema che nus Rumantschs discutain e disputain cun tanta ardur sco nosa lingua. En princip è quai bun ed endretg. Tuttina hai jau savens l'impressiun che questas discussiuns sa movian en rudè e che nus ans occupian surtut dals problems dal rumantsch. Emblidà vegn alura savens las bellezzas da questa lingua singulara e las schanzas colliadas cun quella.

Sco turisticcher da lingua materna rumantscha ma lubesch jau perquai da contemplar ina giada il Grischun dals Rumantschs or da l'optica dal giast.

Tge pudain nus offrir a noss giast ch'ils auters n'han betg? Cun tge plivalur al pudain nus



persvader da passentar sias vacanze en il Grischun e betg en il Valais, en la part sura bernaisa u schizunt en il Tirol? Sajas sincers: ils «arguments da vendita» propri exclusivs pudain nus dumbrar cun la detta d'in maun: il sulet Parc nazional svizzer, la patria da Heidi en il Signuradi, San Murezzan il

Top Of The World e natiralmain la Viafier retica cun sias lingias da renum mundial, il Glacier- e Bernina-Express. Bler memia spert emblidain nus però che nus pudain era offrir en il sector da la «software» insatge unic. Insatge ch'ans distingua da tut ils auters: Quai è nosa trilinguitad – anc adina vivida – e quai è surtut il rumantsch. Il rumantsch n'è betg simplamain ina lingua; il rumantsch è ina part vitala, genuina ed autentica dal Grischun. Nus da Grischun Vacanze n'essan betg mo conscients da la valur dal rumantsch, nus applitgain era adina la lingua dapertut nua che quai è pussaivel. Betg a moda politica u temelitga, mabain da maniera schlucada e ludica. Adina però cun respect. Sche nus ans presentain per exempel a las medias – saja quai a New York, Hamburg, Turitg u Milaun: In

bainvegni, in pèr plets amiaivels en rumantsch na sveglian betg mo simpatia e rumpan il glatsch, mabain fan er mirveglias d'emprender ad enconuscher ils umans, la cultura e la finala er las purschidas turisticas da questa regiun da vacanze tut speziala en las Alps. Jau sun persvas che quest interess sa transpona er sin ils giasts che passentan lur vacanze en in lieu dal Grischun rumantsch. Ed jau sun segir che l'inscunter cun il rumantsch vegn a restar per blers giasts ina da las regurdientschas da vacanze positivas e duraivlas.

Senza dubi, las discussiuns politic-linguisticas èn necessarias. Ma i na fa betg donn, sche nus essan ina gia simplamain loschs d'appartegnair a questa spezia particulara, a quest mini-univers cultural unic. Sco ditg: Tgi che sa rumantsch, ha dapli...!